



## Terenga 3: Hōtaka 13 – Tohutohu (2)

Whakapiri mai ki ngā pātū o Ako kia rangona ai te reo Māori e pāorooro ana, mai i tētehi pito ki tētehi. Ko te tohu tēnā o te ora o tēnei taonga kāmeheheha e whakatairangahia tonuhia nei e tātou.

### Hei Mahi Whakarongo

Tokowhā ngā toka-a-nuku ka rangona e tātou ā kō ake nei i roto i te kiriata o tēnei rā i tīpakohia mai i te hōtaka rangatira o Whakataukī.

Anei ngā pātai hei whakautu mā koutou:

- 1) He aha tā te kupu whakaari mahi?
- 2) Ko tēwhea te momo kōrero e hōrapa ana i te motu?
- 3) Hei aha te whakataukī, e ai ki a Huirangi?

### He Whakamārama

E toru ngā whakamahinga o te kupu 'taihoa' ka tirohia i te rangi nei. Tirohia ngā whakapākehātanga e whai ake nei e kite ai koe i te rerekē o tētehi i tētehi:

#### 1. Taihoa...e (don't do something yet)

- Tai timu, tai pari, taihoa e haere, kia mutu taku riringi roimata e.
- Taihoa e kata, kāore anō kia tae atu ki te rārangi whakamutunga o te kōrero whakakata.

#### 2. Taihoa...kia (don't do something until...)

- Taihoa e pakipaki kia mutu rā anō te waiata.
- Taihoa kia hoki atu au ka kōrero ai tāua.

#### 3. Taihoa...ka/kua (whakamahinga kiwaha) = ākuanei ka puta tētehi āhuatanga

- Taihoa koe ka kite i ngā hua o tō mahi.
- Taihoa kua tae mai te ope.

Tirohia ngā whakapākehātanga kei raro iho nei.

Taihoa tātou e haere.

*Let's not go yet.*

Taihoa tātou ka haere.

*We'll go soon.*

Taihoa kua rongu i te whakatau.

*We'll hear the decision soon.*

Taihoa e pakipaki kia mutu rā anō te waiata

*Don't clap until the song's finished.*

### Hei Mahi

Whakamāorihia ēnei rerenga. Whakamahia te kupu 'taihoa':

1. We'll meet each other soon.
2. I'll follow up on that asap.
3. Don't give up yet.
4. Don't answer until I point to you.

#### He Whakautu:

1. Taihoa tātou ka tūtaki ki a tātou anō.
2. Taihoa au ka whaiwhai i tērā take.
3. Taihoa e mate wheke.
4. Taihoa e whakautu kia tohu rā anō au ki a koe.